

Gvangjsih Minzczu Bau

Guenjbanh: Gvangsijh Bouxcuengh Swcigih Minzczu Cunghgyau Swvu Veijyenzei

Okbanj: Gvangsijh Minzczu Bause

Geiz neix 8 banj

广西民族报

Aenhauhokbanj: CN45-0036

B.2021

Nd.11 Ng.24

Liggaeuq sincouj nienz ndwencib ngeihcib

Geizsoq: Gungh daih 3500 geiz

Lungzswng Gak Cuz Swciyen Angqhoh Laebbaenz 70 Hopbi

龙胜各族自治县喜庆成立70周年

Ndwen 11 ngoenz 19, Lungzswng Gak Cuz Swciyen banh aen hoih hung, angqhoh swciyen laebbaenz 70 hopbi. Daengx Guek Yinzda Minzveij, Guekgya Minzveij Cukhohduenz, Swcigih Daiqbiujduenz, Gveilinz Si Daiqbiujduenz caeuq bouxhek gak dieg nem vunzlai gak cuz Lungzswng caezcaemh angqhoh aen hoihhoengh neix.

Daengx Guek Yinzda Minzveij, Guekgya Minzveij Cukhohduenz donzcangj, Guekgya Minzveij Yizcingz Cunghsinh cujyin Cau Ciminj haengdingh caeuq cukhoh gij cingzcik Lungzswng 70 bi doxdaeuj aeundaej neix. De naeuz, Lungzswng byadah gyaendei, swhyenz comz lai, lizsij gyaeraez, beksingq lauxsaed, minzczu vwnzva lai cungj lai yiengh, saekhoengz vwnzva naekna noengznwd. Lungzswng 70 bi cingzcik ronghlwenq gangmingz, aen cidu dieg minzczu gagguenj hab guekcingz guek raeuz, gij cwngcwz minzczu lijun dangj cingqden, diuzroen gaijgez minzczu vwndiz miz daegsaek Cungguek baenz. Maqmuengh Lungzswng nyinhcaen gvancez gij cingsaenz Aen Hoih Hong Minzczu Cunghyangh, yungh cukmaenh gij eiqsik caezcaemh Cunghvaz Minzczu guh sienqmeh, cauhlaeb aen gyaranz cingsaenz caezcaemh gak minzczu, gaenxmaenx hawj gak minzczu dox baedauq doxgyau doxyungz, mboujduenh comz gij rengz hung Cunghvaz Minzczu ranz caen ndeu, doengzsim cauhlaeb loqsiengj Cungguek.

Swcigih Daiqbiujduenz, Swcigih Dangiveij cangzveij, Dungjancbu buchangj Ciz Sauconh daiqbiuj Swcigih Dangiveij, Yinzda, Cwngfuj, Cwnghez, Gvangsijh Ginhgih caeuq beksingq gak cuz daengx gih cukhoh 17 fanh beixnuengx gak cuz Lungzswng. De naeuz, Cibbet Daih Dangj doxdaeuj, Lungzswng yamq haeuj seizdaih moq hwngfat ceiq ndei, bienqvaq ceiq hung, vunzlai ndaej leih ceiq lai, bonjdieg bouxvunz bingzyaenz guh hong ndaej dij cienz mauhgyaq 3.5 fanh maenz, gihcu j sezsij guh ndaej ngoenz ndei gvaq ngoenz, ciengz ciengq vutgunz gunggeng dwk ndaej hingz, laebdaeb 5 bi youq mwh daengx gih bangfuz cingzyauq gaujhwz



▲Ndwen 11 ngoenz 19, Lungzswng Gak Cuz Swciyen banh aen hoih angqhoh laebbaenz 70 hopbi.

Vangz Yinz ingj

aeundaej daengjgaep “cunghab bingzgyaq ndei”, gij gingniemh lijyouz bangfuz ndaej caeuqfaenh aen lundanz gemjndoj gozci. Maqmuengh coglaeng vunzlai gak cuz Lungzswng laebdaeb cienzmienh gvancez doeksaed gij cingsaenz cijsi youqgaenj baenzroix Siz Ginbingz cungjsuhgi naeuz hong Gvangsijh haenx caeuq gak hangh gezcwz baijbouh Dangjuncunghyangh, Gozvuyen caeuq Swcigih Dangiveij, Cwngfuj, ngeixnaemj doxdoengz, gyo mbaiq haengguh baenaj, dangrap caenguh, hawj Lungzswng seizdaih moq hwngfat youh ndei youh vaiq, vih giet sim comz rengz cauhlaeb aen Gvangsijh gyaendei sevei cuji miz daegsaek Cungguek seizdaih moq ok rengz hung.

Gwnz hoih, bouxcujciz doeg faenh hohdienh Daengx Guek Yinzda Minzveij, Guekgya Minzveij. Swcigih Daiqbiujduenz fudonzcangj, Swcigih fucujisiz Vangz Cinvaz doeg faenh hohdienh Swcigih. Swcigih Daiqbiujduenz soengq baiz cukhoh hawj

Lungzswng caemhcaiq biengj baiz dem. Swcigih Daiqbiujduenz fudonzcangj, Swcigih Yinzda Cangzveijveij fucujyin Luz Yenbenj, Swcigih Cwnghez fucujisiz Yenz Cauzginh, Gvangsijh Ginhgih fucwngveij Cangh Gohbingz camgya aen hoih. Doengh gij hozdung angqhoh lai cungj lai yiengh, miz aen hoih angqhoh, langh baij gij cingzcik swciyen laebbaenz 70 hopbi, vunzlai yienjheiq caeuq ciengz vanjvei yienjheiq angqhoh daengj, cungj langhbaij gij cingzcik geij cib bi ginghci sevei hwngfat caeuq minzczu fungcingz miz daegsaek Lungzswng.

Ngoenzhaenx banringzgvaq, lij banh Lungzswng Gak Cuz Swciyen Ginhci Sevei Hwngfat Codanzvei dem, Swcigih Daiqbiujduenz cwngzyenz caeuq gyoengq boux daiqbiuj vunzlai ganbu gak cuz Lungzswng lwnhgangj laegdaeuq, vih hwngfat youh ndei youh vaiq ok banhfap. Ciz Sauconh yienqmienx vunzlai ganbu gak cuz Lungzswng aeu gvancez doeksaed gij cingsaenz cijsi

youqgaenj baenzroix Siz Ginbingz cungjsuhgi naeuz hong Gvangsijh haenx laegdaeuq bae, ciuq gak hangh gezcwz baijbouh Swcigih Dangiveij, Cwngfuj, genhciz yungh ndei cwngcwz, guh ndei hanghmoeg, hen ndei vanzging, guh ndei cauhmoq, saedhengz aen canloz hwngfat gyaepdoengh cauhmoq laegdaeuq bae, guh ndei canjnieb cienzdoengj, guh hung canjnieb youqgaenj, guh ak canjnieb hwngmoq, dangrap caenguh bae “daiqdaez ca doeksaed, gamj ca doeksaed, caengz dem caengz ca doeksaed”, byaij ok diuzroen hwngfat youh ndei youh vaiq hab saedsaeh dangdieg, laemxsim cauh aen hawsingz diegyouz ndei seiqgyaiq gaep byaij youq baihnaj.

Mwh angqhoh, Swcigih Daiqbiujduenz lij faenbaenz 5 aen duenz, bae lajmbanj, hagdangz, yihyen, giyez caeuq gihgvan danhvei Lungzswng, yawjngonz camnai vunzlai ganbu gak cuz.

(Lij Gwngj Lij Gyahgen)